

即身成佛義

遍照金剛撰

問曰諸經論中皆說三劫成佛。今建立即身成佛義有何憑據。

答祕密藏中如來如是說。

問彼經說云何。

答金剛頂經說。修此三昧者現證佛菩提。

此三昧者謂大日尊一字頂輪王三摩地也。

又云

若有衆生遇此教 晝夜四時精進修

現世證得歡喜地 後十六生成正覺。

謂此教者指法佛自內證三摩地大教王。歡喜地者非顯教所說初地。是則自宗佛乘之初地。具說如地位品中。十六生者指十大菩薩生。具如地位品說也。

又云

若能依此勝義修 現世得成無上覺。

又云

應當知自身 即爲金剛界。自身爲金

剛

堅實無傾壞。我爲金剛身。

大日經云。

不捨於此身 速得神境通。

遊步大空位 而成身祕密。

又云

欲於此生入悉地 隨其所應思念之。

親於尊所受明法。觀察相應作成就。

云云

此經所說悉地者明持明悉地及法佛悉地。

大空位者。法身同大虛而無礙。含衆

象而常恒故曰大空。諸法之所依住故

號位。

身祕密者法佛三密。等覺難見十地何

窺。故名身祕密。

又龍猛菩薩菩提心論說。真言法中即

身成佛故是說三摩地法。於諸教中闕

而不書。

是說三摩地法者法身自證三摩地。諸教者他受用身所說諸顯教也。

又云

若人求佛慧 通達菩提心

父母所生身 速證大覺位。

依如是等教理證文成立此義。如是經

論字義差別何。

頌曰

六大無礙常瑜伽。

體

四種曼荼各不離。

相

三密加持速疾顯。

用

重重帝網名即身。

無礙諸佛

法然具足薩般若。

法佛成佛

心數心王過刹塵。

無數

各具五智無際智。

輪圓

圓鏡力故實覺智。

所申此四句明成佛二字。

釋曰此二頌八句以歎即身成佛四字。

即是四字含無邊義。

一切佛法不出此一句。故略樹兩頌顯

無邊德。

頌文分二初一頌歎即身二字次一頌歎

成佛兩字。

初中又四。初一句體二相三用四無礙。

後頌中有四。初舉法佛成佛次表無數

三顯輪圓後出所由。

謂六大者五大及識。大日經所謂我覺

本不生。出過語言道。諸過得解脫。

遠離於因緣。知空等虛空。是其義也。

彼種子真言曰 *Ṣaṣṭaśrīdhāraṇī*

云云。

爲 *Ṣa* 阿字諸法本不生義者即是地大。

縛字離言說謂之水大。

清淨無垢塵者是則囉字火大也。

因業不可得者訶字門風大也。

等虛空者欠字。字相即空大也。

我覺者識大。因位名識果位謂智。智

即覺故。

梵音沒馱冒地一字之轉。沒馱名覺冒

地曰智。

故諸經中所謂三藐三冒地者古翻云遍

知新譯等覺。覺知義相涉故。

此經號識爲覺者從強得名。因果之別本末異而已。此經偈約五佛三摩地作如是說。

又金剛頂經云

諸法本不生。 自性離言說。

清淨無垢染。 因業等虛空。

此亦同大日經。諸法者謂諸心法。心王心數其數無量故曰諸。心識名異義通。故天親等以三界唯心成立唯識義。自餘同上說。

又大日經云

我即同心位。 一切處自在 普遍於種種

有情及非情。 阿字第一命。 嚩字名爲水。

囉字名爲火。 吽字名爲風。 佉字同虛空。

此經文初句我即同心位者。所謂心則識智也。

後五句即是五大。中三句者表六大自在用無礙德。般若經及瓔珞經等亦說六大義。

如是六大能造一切佛及一切衆生器界等四種法身三種世間。

故大日尊說如來發生偈云

能生隨類形 諸法與法相

諸佛與聲聞 救世因緣覺

勤勇菩薩衆 及仁尊亦然。

衆生器世界 次第而成立。

生住等諸法 常恒如是生。

此偈顯現何義。謂表六大能生四種法身曼荼羅及三種世間。

謂諸法者心法。法相者色法。復次諸法舉通名法相者顯差別。故下句云諸佛聲聞緣覺菩薩衆生器世間次第而成立。

復次諸法者法曼荼羅。法相者三昧耶身。諸佛乃至衆生者大曼荼羅身。器世界者表所依土。此器界者三昧耶曼

荼羅之總名也。

復次佛菩薩二乘者表智正覺世間。衆生者衆生世間。器世界者即是器世間也。

復次能生者六大也。隨類形者所生法也。即四種法身三種世間是也。

故次又言秘密主有造曼荼羅聖尊分位種子標幟。汝當諦聽吾今演說。即說偈曰

真言者圓壇 先置於自體。

自足而至臍 成大金剛輪。

從此而至心 當思惟水輪。

水輪上火輪。 火輪上風輪。

謂金剛輪者阿字。阿字即地。水火風如文可知。圓壇者空。真言者心大也。長行中所謂聖尊者大身。種子者法身。標幟者三昧耶身。羯磨身者三身各各具之。具說者經文廣說之。臨文可知。

又曰大日尊言金剛手有諸如來意生作業喜戲行舞廣演品類。攝持四界安住心王。等同虛空成就廣大見非見果出生一切聲聞辟支佛諸菩薩位。

此文顯現何義。謂表六大能生一切。何以得知。謂心王者識大。攝持四界者四大。等虛空者空大。此六大能生。見非見者欲色界無色界。下如文。即是所生法。

如此經文皆以六大爲能生以四法身三世間爲所生。

此所生法上達法身下及六道雖麤細有隔大小有差然猶不出六大。故佛說六大爲法界體性。

諸顯教中以四大等爲非情。密教則說此爲如來三摩耶身。

四大等不離心大。心色雖異其性即同。色即心心即色。無障無礙。智即境界

即智。智即理理即智無礙自在。

雖有能所二生都絕能所。法爾道理有何造作。能所等名皆是密號。執常途

淺略義不可作種種戲論。

如是六大法界體性所成之身無障無礙
互相涉入相應。常住不變同住實際。
故頌曰**六大無礙常瑜伽**。解曰無礙者
涉入自在義。常者不動不壞等義。瑜
伽者翻云相應。相應涉入即是即義。
四種曼荼各不離者。大日經說一切如
來有三種祕密身。謂字印形像。字者
法曼荼羅。印謂種種標幟即三昧耶曼
荼羅。形者相好具足身即大曼荼羅。
此三種身各具威儀事業。是名羯磨曼
荼羅。是名四種曼荼羅。

若依金剛頂經說四種曼荼羅者。一大
曼荼羅。謂一一佛菩薩相好身。又綵
畫其形像名大曼荼羅。又以五相成本
尊瑜伽又名大智印。

二三昧耶曼荼羅即所持標幟。刀劍。
輪寶。金剛。蓮等類是也。若畫其像
亦是也。又以二手和合金剛縛發生成
印。是亦名三昧耶智印。

三法曼荼羅本尊種子真言。若其種子
字各書本位是。又法身三摩地及一切
契經文義等皆是亦名法智印。

四羯磨曼荼羅即諸佛菩薩等種種威儀
事業等。若鑄若等亦是亦名羯磨智印。
如是**四種曼荼羅四種智印其數無量**。

一一量同虛空。彼不離此此不離彼。
猶如空光無礙不逆。故云**四種曼荼羅
各不離。不離即是即義**。

三密加持速疾顯者。謂三密者一身密
二語密三心密。法佛三密甚深微細等
覺十地不能見聞。故曰密。一一尊等
具剎塵三密互相加入彼此攝持。衆生
三密亦復如是。故名三密加持。

若有真言行人觀察此義。手作印契口
誦真言心住三摩地。三密相應加持故
早得大悉地。

故經云此毘盧遮那三字密言共一字無
異。

適以印密言印心成大圓鏡智速獲菩提
心金剛堅固體。

印額應當知成平等性智速獲灌頂地福
聚莊嚴身。

以密語印喉時成妙觀察智即能轉法輪
得佛智慧身。

誦密言印頂成所作智證佛變化身能
伏難調者。

由此印密言加持自身成法界體性智毘
盧遮那佛虛空法界身。

又云入法身真如觀一緣一相平等猶如
虛空。

若能專注無間修習則入初地頓集一大
阿僧祇劫福智資糧。

由衆多如來所加持故。乃至十地等覺
妙覺具薩般若自他平等與一切如來法
身共同常以無緣大悲利樂無邊有情作
大佛事。自此下儀軌之

又云若依毘盧遮那佛自受用身所說內
證自覺聖智法及大普賢金剛薩埵他受
用身智。則於現生遇逢曼荼羅阿闍梨
得入曼荼羅。

爲具足羯磨以普賢三摩地引入金剛薩
埵入其身中。猶加持威德力故。於須
臾頃當證無量三昧耶無量陀羅尼門。
以不思議法能變易弟子俱生我執種子
應時集得身中一大阿僧祇劫所集福德
智慧則爲生在佛家。

其人從一切如來心生從佛口生從佛法
生從法化生得佛法財。法財者謂三密
菩提心教法。此明初授菩提心戒時阿闍梨加持
方便所得之益

纔見曼荼羅能須臾頃淨信。以歡喜心
瞻視故。則於阿賴耶識中種金剛界種
子。此文明初見曼荼羅海會諸尊所得益
具受灌頂受職金剛名號。

從此已後受得廣大甚深不思議法超越
二乘十地。

此大金剛薩埵五密瑜伽法門於四時行

住坐臥四威儀之中無間作意修習。於見聞覺知境界人法二空執悉皆平等現生證得初地漸次昇進。

由修五密於涅槃生死不染著。於無邊五趣生死廣作利樂。分身百億遊諸趣中成就有情令證金剛薩埵位。此明

依儀軌法則修行之時不思議法益

又云三密金剛以為增上緣能證毘盧遮那三身果位。

如是經等皆說此速疾力不思議神通三摩地法。若有人不闕法則晝夜精進現身獲得五神通。漸次修練不捨此身進入佛位。具如經說。

依此義故曰三密加持速疾顯。加持者表如來大悲與衆生信心。佛日之影現衆生心水曰加。行者心水能感佛日名持。

行者若能觀念此理趣三密相應故。現身速疾顯現證得本有三身故名速疾顯。如常即時即日。即身義亦如是。

重重帝網名即身者是則舉譬喻。以明諸尊剎塵三密圓融無礙。

帝網者因陀羅珠網也。

謂身者我身佛身衆生身。是名身。又有四種身。言自性受用變化等流。是名曰身。又有三種。字印形是也。

如是等身縱橫重重如鏡中影像燈光涉入。彼身即是此身。此身即是彼身。佛身即是衆生身。衆生身即是佛身。不同而同。不異而異。

故三等無礙。真言曰。歸命句。如常

阿三迷底哩三迷三昧曳莎呵。初句義云無等。次云三等。後句云三平等。

佛法僧是三。身語意亦三。心佛及衆生三也。

如是三法平等平等一也。一而無量。無量而一。而終不雜亂故曰重重帝網名即身。

法然具足薩般若者。大日經云。

我一切本初。號名世所依。說法無等比。本寂無有上。

謂我者大日尊自稱。一切者舉無數。本初者本來法然證得如是大自在一切法之本祖。

如來法身衆生本性同得此本來寂靜之理。

然衆生不覺不知。故佛說此理趣覺悟衆生。

又云諸樂欲因果者非彼愚夫能知真言真言之相。何以故。

說因非作者彼果則不生。此因因尚空。云何而有果。當知真言果悉離於因果。

上文所引我覺本不生乃至遠離於因緣偈及諸法本不生乃至因業等虛空如是等偈皆明法然具足之義。

又金剛頂云
自性所成眷屬金剛手等十六大菩薩乃至各各流出五億俱胝微細法身金剛。

如是等文亦是此義也。

言法然者顯諸法自然如是。具足者成就義。無闕少義。

薩般若者梵語也。古云薩云者訛略。具云薩羅婆枳孃囊。翻云一切智智。

一切智智者。智者。決斷簡擇義。

一切佛各具五智三十七智乃至剎塵智。次兩句即表此義。若明決斷德則以智得名。顯集起則以心得稱。顯執持則法門得稱。一名號皆不離人。如此

人數過剎塵。故名一切智智。

不同顯家一智以對一切得此號。

心王者法界體性智等。心數者多一識。各具五智明一心王心數各各有之。

無際智高廣無數之義。

圓鏡力故實覺智者此即出所由。一切諸佛因何得覺智名。謂如一切色像悉現高臺明鏡之中如來心鏡亦復如是。圓明心鏡高懸法界頂寂照一切不

倒不謬。如是圓鏡何佛不有。故曰圓
鏡力故實覺智。
即身成佛義

